



Aqqalu C.Jerimiassen
Atassut

UKA 2024/24
21. november 2024

Siunnersuut uunga: Utoqqarnut tapersersuinissaq pillugu Inatsisartut inatsisaat

(Isumaginninnermut, Ilaqutariinnut, Suliffeqarnermut Nunamullu Namminermut Naalackersuisoq)

Inatsissaq nutaaq Atassummiit tikilluaqqarput. Nuannaarutigarpullu Naalackersuisut una siunnersuutigimmassuk. Naak utoqqaap pillugit suliassat tulluarsagassallu annertugaluartut utoqqarnut ukununga pineqartunut iluaqutaasinnaappat ilaana taperserparput.

Ukiunimi tulluuttuni utoqqaat amerliartuaaginnavittussaapput, tamannalu politikkikkut malinnaaffigalugulu tulluarsaanissat piareersimaffigisariaqarpugut. Uanilu utoqqaat pillugit inatsisiliornissaq alloriarfittut siullertut taarusunnarpoq isumalluarnarlunilu.

Utoqqaat pillugit aqqitassaasinnaasut arlallit ugguuna saqqummiutinnikkaluarlugit tapersiilluta Atassummiit oqassaagut, tulluuttunullu suleqataanissatsinnut piareersimalluta.

Tapersersortuartariaqarpagummi utoqqartagut eqqartorneqartillugit, minnerpaamik pitsannguutaasinnaasutut iluseqarpata allatut ajornartumik akisussaaqataasariaqaratta.

Maanna uani siunnersuummi utoqqartatta amerliartupiloornerat arlaatigut iliuuseqarfigineqarnera qujanarpoq.

Peqqinnissaqarfippummi utoqqaallu illui aammattaaq ukiuni aggersuni annertuumik artukkerneqarsinnaanerit aarleqqutaalluurtunut ilaavoq.

Inuiaqatigiinni aqqissugaanitta ukioqqortussutsikkut nikiganerujussui, inuusunnerusullu ikinnerunerujussui soq taamak inissisimanersut nalunngilarput, tassalu spiralilersuisimaneq naalagaaffimmik ingerlanneqarsimasoq.

Uanilu naak inatsisissamut immaqa toqqaannartumik atassuseruminaassinnaangaluaq, Atassummiit imannak naalackersuisunut kaammattuuteqarumavugut; soraarnerussutisiaqalartortassagut amerlaqisut akileraartuusussaniit amerlanerulersussat eqqarsaatigalugit naalagaaffik aningaasalersuinikkut ikiuuttariaqarpoq!

Meerartaarsinnaasimangitsorpassuit kingunerannik utoqqaat amerlanerujussuannngortussanngornerinut nammatassaq tamatsinnut taamarsuaq kingunerluttariaqanngilaq, tassani naalagaaffik akisussaaffimmik tiguisariaqarpoq iliuuserisimasaminut!



Utoqqartagut soraarninngoreernerminni kiffaanngissuseqarlutik eqqissillutik inuunissaat Atassummi pingaarnerpaatitatta akornganni pilersinneqarnitsinniilli akuusimavoq, tupinnanngenaarlu sooq utoqqaat partiaannik taaneqartarnersugut.

Soraarnerussutisiallimmi akileraartarunnaarnissaannut tunngasumik aamma siunnersuuteqarnikuuvugut, taannalu nassuiaat naammassereerneqarsimasoq maanna takusinnaalereerparput naalakkersuisut nittartagaanni.

Pissagagiinnarsinnaasarpullu maanna tullinnguutoq tassaavoq, naalakkersuisut taanna nalunaarusiarineqarnikoq atussaneraat imaluunniit ilisivinni pujoralassiinnarumaarneraat. Eqqaamasarami malillugu 2021-imi ukiakkut ataatsiinnermi maanna naalakkersuisooqataasut partiit utoqqartatta akileraartarunnaarnissaattaq oqariartuutiginiikummassuk.

Taamaakkaluartoq una inatsisissatut siunnersuut taperserparput, aappassaaneerneqartiganilu isumaginninnermut peqqissutsimullu ataatsimiitsitaliamut innersuullugu.